

共同經課 - 1 使徒行傳二章一節~二十一節

1 五旬節的期已經到，in 攏聚集佇一所在。2 忽然，對天有聲，親像大風啲吹，充滿 in 所坐歸間的厝，3 就有啲分開的舌出現互 in 看見，親像火的舌，歇佇逐人的頂面。4 in 攏受聖神充滿，才開嘴講別樣的腔口，是照聖神所賞賜 in 講的。5 彼時，有虔誠的猶太人對天下逐國來的，住佇耶路撒冷。6 此個聲一下起，眾人聚集紛紛亂亂，因為逐人聽見 in 照伊家己的土腔來講，就攏印愕；7 奇怪講：「你看，諸個啲講的豈無一概是加利利人嗎？8 怎樣咱聽 in 講照咱逐人所出世的土腔啊？9 咱諸個帕提亞人、米太人、以攔人，及惦佇米所波大米、猶太，及加帕多家、本都、及亞西亞、10 弗呂家，及旁非利亞、埃及，近倚古利奈的呂彼亞，諸個地方的人，以及對羅馬來的出外人，有的是猶太人，有的是入猶太教的人，11 革哩底人、亞拉伯人，攏聽 in 用咱的腔口，來講上帝的大事。」12 就攏印愕躊躇，相及講：「這甚麼意思？」13 亦有別人恥笑 in 講：「in 是飲新酒啲醉。」14 總是彼得及十一個使徒倚啲，大聲給 in 講：「猶太人及攏總倚起佇耶路撒冷的百姓啊，恁著知此個，亦著致意聽我的話。15 諸個人毋是酒醉；親像恁所拍算，因為此雲抵才頂晡九點鐘。16 這就是託先知約珥所講的，講：17 上帝講：佇路尾的時日，我欲用我的神降落佇凡有肉體的。恁的後生恁的查某子欲做先知講話；恁的少年人欲看見異象；恁的老人欲得著眠夢。18 佇許個日，我也欲用我的神降落佇我的奴僕奴婢，in 亦欲做先知來講。19 頂面佇天裡，我欲顯出奇事；下面佇地裡，我欲顯出神蹟；就是血，及火，及煙霧。20 日欲變做暗，月欲變做血；佇主大閣榮顯的日未到前的代先。21 閣凡若求叫主的名，會得著救。」

共同經課 - 2 詩篇一百零四篇二十四節~三十四節，三十五 b 節

24 耶和華啊，你所造的怎樣許多！攏是你用智慧造成的；遍地滿滿你的富有。25 遐有海，大闊闊；其中有算袂了的動物，大細的活物攏有。26 佇遐有船啲行，有所創造的大魚游來游去。27 諸個攏啲聽候你通照時互 in 食物。28 你互 in，in 就拾起來；你展開你的手，in 得著好物夠飽。29 你掩你的面，in 就掛慮；你將 in 的氣收回，in 就死無，來歸佇土粉。30 你發出你的神，in 就受創造；你互地面換做新。31 願耶和華的榮光永遠佇啲！願耶和華為著伊所造的來歡喜！32 伊看地，地就振動；伊摸山，山就出煙；33 我欲一世人向耶和華吟詩！我猶活的時，欲向我的上帝唱歌謳嘍！34 願伊掠我的靜靜想做合意！我欲因為耶和華歡喜！35 願歹人攏無去！我的心神啊，著謳嘍耶和華！恁著謳嘍耶和華！

共同經課 - 3 羅馬書八章十四節~十七節

14 凡若互上帝的神所導的，是做上帝的子。15 因為恁毋是受著奴僕的神，致到閣驚惶；就是受著設立做子之神，對按呢咱叫講：「阿爸！父啊！」16 聖神家己及咱的神相及干證咱做上帝的子；17 既然做子就做後嗣，就是做上帝的後嗣，及基督同做後嗣。咱若及伊同受苦，是欲互咱及伊同榮光。

共同經課 - 4 約翰福音十四章八節~十七節(二十五節~二十七節)

8 腓力給伊講：「主啊，用父互阮看，就夠額。」9 耶穌給伊講：「腓力，我及恁惦到即久，你猶毋識我嗎？已經看見我的，就是看見父；你怎樣講『用父互阮看』啊？10 我惦佇父，父亦惦佇我，你毋信嗎？我所給恁講的話，毋是出佇家己來講，就是父住佇我來行伊的代誌。11 我惦佇父，父惦佇我，恁著信我；若無，就著因為所行的事來信我。12 我實實給恁講，信我的人，我所行的伊欲行伊，就比諸個事卡大的亦欲行伊，因為我歸佇父。13 恁佇我的名凡所求的，我欲行伊，互父佇子得著榮光。14 恁若佇我的名有所求我的，我欲行伊。」15 「恁若疼我，就欲守我的命令。16 我亦欲對父求，就伊欲用閣一個保惠師互恁，互伊永遠及恁住，17 就是真理的神，世間所袂接納的；因為無看見伊，閣毋識伊。獨獨恁識伊，因為伊及恁相及住，閣欲惦佇恁。25 「我猶及恁住的時，有將諸個話給恁講。26 若是保惠師就是聖神，父佇我的名所欲差的，伊欲將一切的事教示恁，閣欲互恁記得我一切所給恁講的。27 我用平安留啲互恁；我將我的平安賞賜恁。我啲互恁，毋是親像世間啲互人的款。恁的心莫得迫腹，亦莫得驚惶。」